

EZEQUIEL

Jawen unanmati janchaki

Ja año 597 Cristo judiamatian Judán enabu Joaquín jatu xanen ibujaidaxunaya janua Diosbe jawenabu janchaxunika Ezequiel Babilonia anu Nabucodonosorin jatu iyuni jadi jawenabube jiwea jawen jancha yuixunika wakín Jehován Ezequiel katunikiaki. Caldea nawabun mai pakekauana anu jawenabu iyunibu jiwebaunabu anu Jehován jancha Ezequiel jatuki chanikunkaini inun, Jerusalén chakabuwakin keyunibu anu jabu ana chintunxanaibukidi Ezequielin jatu banabimakin inun, jatun yushibu dami kenwankin beyawanibu jatu putamakin ana Jehován jatu chintunmaxanai Ezequielin jatu yuidiakubainikiaki.

Jawen tsautiki Dios tsaua Ezequielin uinikiaki, na janchadan

1 ¹Ja xaba 5 inun, uxe 4 inun, año 30^{tian} Babilonia anu Nabucodonosorin enabun jatu iwenibube ea Ezequiel en jiwea xaba betsatian jene jawen kena Quebar kexa anu en niken nai bepemanakainai anua nama keskakin Dios en uiniki. ²Ja jaskaidan, Babilonia anu Judán enabun xanen ibujaida Joaquín iyuyamabu ma 5 año kaitianan, ³ea en Buzín juni bake Diosbe enabu en jatu janchaxunika Ezequiel anu Diosun jawen jancha ea yuiniki, Caldea nawabun enabube jatun mai pakea anu ea iwenibu Quebar jene kexa en niken januxun Jehován jawen kushipawen ea meniki. ⁴Ea meaya nortekidia niwewan kushipajaida meshu mayakabidani beai en uianyan nai kuin anua kana bakai keskai chi taxnibidani puabaunaya chaxajaida baka baka ikai medan mane chaxa chaxa ikai keska ⁵ja namakis uke medanua juni kuin itsa dabe inun dabe jiweabu en uinyamaki. ⁶Jabu tibidan, jatun buxka anu dabe inun dabe besuya inun dabe inun dabe pei jayabuki. ⁷Jabun kishi yuxtuma ina awa baken juntsis keskabuki. Ja jabun juntsisidan, mane bronce tashipa deken ji ji ikai keskabuki. ⁸⁻⁹Ja dikabi jabu dabe inun dabe besuya inun dabe inun dabe peiyabudan, ja jatun pei tsamia naman jatun pishkin nata medan jatun meken dabe inun dabe tsamia jayabuki. Jabun pei tibidan, mexti ibukunaki. Jabu mapuidan, jawa chintuanma

jadidis bumisbuki. ¹⁰ Jabun besu betsa betsapakidi matu yuinun ninkakanwen. Ja jiweabu dabe inun dabe tibi 4 besuya betsa ja dukunan, juni kuin besuki. Yusiudidan, inu betsa león ewapatun besuki. Ukedi yusmaudi ina awa benen besuki. Ukedi pechiudi nawa tete besu jayaki. ¹¹ Jabun punyan peiyadan, dabedan, manaundi peshaki. Dabe betsadan, pei mexti ibaunaki. Ja pei dabewendi ja tibitun jatun yuda bepuabuki.

²² Ja jiweabu mapubaunabu nai jatu mamaki dunua anu jawada jene keska chaxajaida jayaki. ²³ Ja nai namanan, ja jiweabun pei peshai puntei mexti ikabuki. Ja tibitun jawen pei betsa dabewen jatun yuda bepuabuki. ²⁴ Jaska uinkin en ninkaya jatun peiwen mapua buidan, jene bai mata chakayama kushipamis keska jawen juiki. Ja jaskadan, Dios kushipa dasibi binuatun jui keskai inun, detenamenikabu midimajaida kushibainaibu keska jabun pei xun xun ibaini ja jiweabu jaskabaini niti ika mapua niti itan jatun pei utsi waibun ²⁵ jabun buxka masuatun nai dunua mamakia jui kushipa taxniaya ²⁶ ja nai dunua mamakia uinkinan, xanen ibun tsauti bishtu nanketapa bexnajaida keska anu ja tsauti anu yuda kayabi keska tsaua en uianyan ²⁷ ja juni keska jawen natu manankidi en uianan, chi anu machatu xuia kujaidai deken deken imis keska ja juni keska jawen natu maikidi chi jayadiki. Ja jaskatun yabu keyubauna chaxa chaxa ikikiki. ²⁸ Ja dunkebauna chaxa chaxa ikai anu ui itan nawan bai tapimis keskai nai kuin anua Diosun kushipa jawenduajaida jui taxnikainaya jaska Jehová chaxa chaxa ikai ea uinmai uintan kenwain danti iki main beti ika en dakaken,

Diosun Ezequiel katutan yununikiaki, na janchadan

2 ¹ Januxun jawen jui taxniai en ninkaya ea yuikin: “Midadan, min juniki. Beniwe, en mibe janchaidan”, ea waya ² ja jui kainkin ea jancha waya jabiatandi jawaida Diosun Yushin kushipa ea medan jikitan ea benia en niken jabias juiwen ea jancha waxu ana en ninkaya ³ ea yuikubainkin: “Min miaki, junidan. En mia yunuai Israelin enabu ea jatu yuixuntanwen, jabun en jancha ninkakin chibainsbuma patapabun ea danain eki sinatamisbu anudan. Jatun xenipabun ea danankin taewaniken na jabiatandi jabun bababundi ea danandiakubainkanikiki. ⁴ Jamen jatun bakebudan, juinti kushi inun buxka kushi shinan betsa wakatsi isbuna anu en mia yunuaii. Kaxun jatu yuikin: ‘Jehová Diosun eska matu yuikiki’, ⁵ min jatu wa mia ninkakanimenkain, mia ninkabumamenkain, ja junibudan, ninkaisma sinatapabuki. Jabu jaska jiwebiaken mia min Diosun jancha yuixunika min jatube jiwea jabun unanxankanikiki. ⁶ Mia min junidan, jabuki dateyamaxanwen. En jancha min jatu yuibia jabudan, eskabun mia achia min jiwexanaii. Muxan mia yabubauna keska inun nibube min jiwea keskaxanaiwen taea jatuki mesei

dateyamaxanwen. Jabudan, ninkatidubuma sinatajaidabuki. Jaskawen taea jabun jawada yuikin mia datetidubuwen e iki dateyamaxanwen. ⁷En jancha dananjaidai eki sinatamisbun min jancha mia ninkakanimenkain, mia ninkabumabiaken jabiaskabiaken en jancha jatu yuikubainxanwen. ⁸Jawada en mia yuiai ninka pejaida wawe, jatu keska sinatapakin en jancha dananma jawada en mia inain jaxpattan mukukin piwe”, ea waya ⁹januxun meken taxnimabidankin una kene sebi tsuma jaya ekidi sananbidanai en uianyan ¹⁰ea bebunxun ja una sebi chudeai uke bukun keneya kaxai bis ikai kene jaya inun, isin mei bika teneai kene jaya inun, puben jancha kene jaya en uianyan

3 ¹Januxun ea yuikin: “Mianan, na una keneya piwe. Jaska watan Israelin enabu jatu jancha wakin uin kadiwe”, ea wakin ²ea jaxpa watan ja una keneya jatun ea pimakin ³ea yuikin: “Na una keneya en mia inainan, pikin xeawe, ikisdan. Yaniwakin min jatu mata wawe”, ea wa

ean pikinan, jawen nis buna bata keska en meimaki. ⁴Januxun ea ana yuikin: “Kaxun jaska Israelin enabu en jatu jaska yuikatsis ikai ea jatu yuixunkubainwen. ⁵Yuda betsabu jatun jancha junea bika min tapintiduma anu en mia yunuamaki. Jakia Israelin enabu anu en mia yunuaii, jatun janchawen min janchai anudan. ⁶Yudabu betsa betsapa midimabu anu jatun jancha itimaska inun bika min tapintiduma anu en mia jaskanu yunuamaki. Jabiaskabiaken jabu anu en mia jatu yunua jabun mia ninkatidubu ikeanaii. ⁷Jamen mia janu yunuama ja dasibi Israelin enabu juinti kushibu inun besu kushibu jabun ea ninkaisbumawen taexun miadi ninkama ixankanikiki. ⁸Jakia jabu keska en mia wadiai, min besu inun min juinti mia kushi wakinan. ⁹Ja nenkati diamante keska wakin en mia kushipa waxanaii, mishki betsa kushipa binua keska wakinan. Ea danan paepa wamisbuwen taexun jawada mia bebunxun yuiaibu jatuwen taea teku iki dateyamakunkainxanwen”, iwanan,

¹⁰ana ea yuikin: “Dasibi en mia yuai pes nixun ninka pejaida wakin min buxka medan netanwen, jakimatimaidan. ¹¹Minabu Babilonia anu iwenibu jatu uin kadiwe. Mia ninkatidubumenkain, mia ninkabumabiaken: ‘Jehován eska matu yuikiki. Ninkakanwen’, iwanan, ea jatu yuixunxanwen”, ea wa

¹²Januxun Diosun Yushin kushipatun ea benitan ea duntanbainaya ea kachun Jehován xantu anua jawen kushipa chaxa chaxa iki benikainaya mai pacha sakui keskai unanxubima danka ikainkaini keska en ninkaya ¹³ja jui danka ikidan, ja 4 junibun pei nuyabaini xun xun ibainai anu jawen tadanbainti tae jatun yudaki tsamianwen buidan, unanxubima tin ikainkaini mai pacha sakujaidai keskaki. ¹⁴Diosun Yushinen ja en nia anua ea nuyanbainkin ea iyukin Jehován jawen mekenen ea tsuma

chakayamaxun ea iyua punu nuka sinatayabi dunukaini kai ¹⁵Jene Quebar kexa anu ea butea Israelin enabu Babilonia anu jatu iwenibu mae betsa Tel Abib anu jiweabu anu jikitan janu 7 xaba ea jatube jiweyuxun en jawa unanmawen taea en jawa watiduma inun en jawa jatu yuitiduma ikaya

**Israelin enabun chakabuwaibu jau jatu nemanun Jehován Ezequiel
uinika katunikiaki, na janchadan
(Ez 33.1-9)**

¹⁶Ja 7 xaba keyuaya Jehován ana ea yunukin yuikin:
¹⁷“Miadan, Israelin enabun chaninika en mia waii. Januxun jaska en jancha bebunkidi en mia yuia jatu unanmakin ea jatu banabimaxunkubainxanwen. ¹⁸Eskakidi en shinain ea ninkawe. Tsuada ja chakabuaikidi en kupitiwen jau mawanunbun en jakidi mia yuia jawen chakabu jenetan jau jiwekunkainxanun nemakin min jawa jatu jancha wama, jawen chakabuwen taea mawaxanikiki, en kupiadan. Jakia mian kanekin tsuada jawen chakabukidi nemakin min medabewama ma mawaken jawen taexun en mia kupixanaii. ¹⁹Jakia tsuada jawen chakabukidi yuikin min nemaya jawen chakabukidi shinan betsa wama jawen chakabu jeneamawen taea mawaxanikiki, en kupiadan. Jakia mianan, min jatu nemakin shinan betsa wamashinawen taea min jiwea min mekexanaii. ²⁰Jaska inun, betsa en shinainan, tsuada ea ninkai pepabiakunkaini jatun pepa jenetan ana chakabuwakubainaibun mesekidi en jatu yunua bui juti ikain di ikabu keska nemakin min jawa jatu jancha wama jatun chakabu jeneabumawen taea mawaxankanikiki, en jatu kupiadan. Jatun pepa akubainimabukidi en ana shinanma jatun chakabuwen taea mawaibun jakia mian kanekin min jatu nemama ishianwen taexun en mia kupixanaii. ²¹Jakia jau chakabuwayamanun nemakin bebunkidi min xabakabi yuia mia ninkatan ana jawa chakabuwamawen taea jiweyuxanikiki, en ana kupiamadan. Bebunkidi min jatu yuishinawen taea jamen miadan, ibubis mekei min jiweyukunkainxanaii”, itan,

Jhován Ezequiel juyu wanikiaki, na janchadan

²²ea jaska jancha wakin jawen kushipawen ea mekin Jehován ana ea yuikin: “Nenua benikaini kaidan, napanpakidi kawe, jadia en mibe janchaidan”, ea wa ²³benikaini napanpakidi kaxun Jene Quebar kexa nixun jaska en uinma keska jadixundi Jehován kushipa chaxa chaxa ikai ana uin danti iki main en beti iken ²⁴januxun Diosun Yushin kushipa ea medan jikitan ea benia en niken Jehován eska ea yuikin: “Kai min jiwetan jikitan min jiwe beputi bexetanwen. ²⁵Uian. Min jiwe anua min kainkainyamanun dispiwen jabun mia binexxanikiki, kainkaina min

ana yudabube niyamanunan. ²⁶Ja dikabi eanan, min ana janchatiduma wakin min janxakaki min jana en mia tsanpa waii, min juyununan. Jabun en jancha dananbiamisbun jatu ja akin min jatu pewatiduma ixanaii. ²⁷Jakia jawada en mia yuimakatsi ikaitian en mia ana jancha pesamakubainxanaii. Januxun jatu yuikin: ‘Eska Jehován matu yuikiki’, iwanan, min jatu ea yuixunkubainxanaii. Minabu jawa ninkaisbumawen taexun tsuabunda ninkakatsi ikin ninkakubainxankanikiki. Jakia tsuabunda ninkakatsi ikabuma jau ninkayamakubainxanunbunwen”, akin ea jaska waniki.

**Diosun juni unanti waya ibubis pe
mekekubaintidubukiaki, na janchadan**

18 ¹Ana Jehován ea jancha wakin yuikin: ²“Israelin enabun jatun beya chakabu atiani jabias chibankin jeneama yuikin: ‘Uva bimi bunkash pia keska wakin jatun epabun chakabuwakubainaibu jatun xeta maxexai keskai jatun bakebu nuitapai bika tenekubainmisbuki’, jaska janchai ¿jaskakin Israelin enabun jaska yui bextekediabumamen? ³Ea en Jehová en jiweawen taea ibubis en yubakaidan, matubu Israelin enabudan, na jaskakubainaibu jancha jenetan ana chintunkidan man yuiama ikunkainxanaii. ⁴Juni inun ainbu dukun en dami waniwen taea dasibibu enaski, jatun ibubu inun jatun bakebudan. Jaskawen taea jadatutunda chakabuwatan ibubis jawen chakabuwen taea mawakubainxankanikiki, en jatu kupiadan.

⁵Jamen juni pepabu ikidan, eskamisbuki. Padananainsma inun chanichakaisma ikubainmisbuki. ⁶Jawenabun beya mati medibi anuxun yushibu dami kenwainbu anuxun jatubetan pi chakabukunkainsma inun, kanekin Israelin enabun mekenika yushibu chani duawai jaki chiti isma inun, jatu dapi jiweabu jatun ain jawa jatu meinsma inun, jawen ain jimi ikai chutaisbumadan, ⁷ja dikabi, jawa tsua ichakawaisma inun, junin dibia ma pakaken jawen mabu biainma juni pepabun jawen mabu jatu ana inanmisbuki. Jawa betsa taska jatu yumetsuamadan, januxun nuitapai buniaibu jawen piti jatu pimamisbuki. Ja inun, juni betsa tadiuma uinkin jatun tadi betsa jatu inanmisbuki. ⁸Ja dikabi pei inanshinxun jawena wakin ana xekaisbumaki. Jawa tsua bika tenemaisbumaki. Januxun jawadawen taea yuda dabe ja ikaibu kaneama pepawen besti jatu unanti wamisbuki. ⁹Ja juni pepadan, en yunuti jancha inun en nemati jancha shinankin en yusinti jancha dasibi chanima chibankin tsua jatu padainsma ja juni pepa kayabibuwen taea pe jiwekubainxankanikiki, en jawa jatu kupiamadan. Ea Jehován chanima en jancha en mestenwaiin.

¹⁰⁻¹¹Jamen ja juni pepabiaken jawen juni bake betsan jawen epan shinan chibankin akama na jaska tibi mei chakabukunkaini jaska jawen bake en

uintiduki. Jawaida sinatai detenamei inun, yuda betsa tenainan, ja inun, mati medibi anuxun jawenabun yushibubu dami kenwainbubetan pikubainmis inun, ja dapi jiweabun ain chutamis inun, ¹²nuitapaibu inun jawa jayabuma ichakawakin medabewaisma inun, yuda betsa betsapabun jatun jawada yumetsumis inun, juni betsan dibia ma pakabiaken jawen mabu biainma ja yaushikin ana inainsma inun, mekenika yushibu chani duawakin kenwanmis inun, jawada betsa betsapa en bechipaiama akubainmis inun, ¹³pei inanyutan ana jawena wakin binumakin ichapa watan yukamisbudan, jaskabudan, jiwetidubumaki. Jawada dasibi en bechipaiama akubainaiwen taexun xanen ibubun jau kupikin tenanxanunbunwen, tsuan jawa jatu nemamadan. Ibubis ja juni jatun shinan chakabuwen taea mawaxankanikiki, en jatu kupimadan.

¹⁴Jamen juni chakabun bakebia jawen epan chakabu akubainai uinbiakin jawen jiwea chibainsma eskatidubuki. ¹⁵Mati medibi tibi anuxun yushibu dami kenwantaan pimisbube ichaisma inun, kanekin Israelin enabun mekenika yushibu chani duawai jaki chiti isma inun, ja dapi jiweabun ain jawa meisma inun, ¹⁶tsua ichakawaisma inun, pei bianyuaya jau pakaxun bixanun, iwanan, jawen mabu betsa biainsma inun, jawada tibi jatu yumetsuismadan, jakia jawen piti paxkatan jawa jayama buniaibu jatu inanmis inun, tadiuma nuitapaibu jawen tadi betsa jatu inanmis inun, ¹⁷jawa tsua ichakawakin chakabuwaisma inun, pei inanyutan ana jawena bikin xekakin yukaismadan, ja junin jaska wakinan, en yunuti jancha inun en nemati jancha shinankubainkin en yusinti jancha chibain jatun ibubun chakabuwen taea jawa mawama ixankanikiki, en jatu jiwemakubainadan.

¹⁸Ja inun, betsadan, jatun epan jawenabu ichakawakin jatu yumetsukin kanekin chakabu betsa betsapa wakubainaya jawen chakabuwen taexun kupikin jau tenanxanunbunwen. ¹⁹Jakia matubu yuka iki: ‘¿Jaskakin jawen juni bake nun kupiamamen, jawen epan chakabuwen taexunan?’ man ikaya eskaki. Matu yuinun ninkakanwen. Jawen juni baken en yunuti jancha inun en nemati jancha shinankin en yusinti jancha chibankubaini jatu padainsma inun chanichakaismawen taea chanima jiwexanikiki, en medabewakubainadan. ²⁰Jamen betsadan, tsuanda chakabu besti wakubainai jabu besti mawaxankanikiki, en jatu kupiadan. Jatun epan chakabuwen taexun jawen juni bake jawen kupitiwen jatu tenantimaki. Jabiaskadi wakin jawen juni baken chakabuwen taexun jawen ibu kupitimadiki. Tsuanda pepa akin jaska Diosun bechipaimis chibanmisbun manakuti pepa bixankanikiki. Jakia tsuanda chakabu betsa betsapa akubainmisbun kupiti chakabu bixankanikiki”, itan,

**Jehová kaneismatun pepa waibu inun chakabuwaibu unantan jatu
kupixanikiaki, na janchadan
(Ez 33.10-20)**

²¹“Junibun chakabuwabiakubaini jatun chakabu jene keyutan en yunuti jancha inun en nemati jancha shinankubainkin ana kaneama

pepas akubaini jiwekubainxankanikiki, en kupitiwen jawa mawamadan. 22 Ja junin jaska chakabu akubaini ean en ana shinanma ja juni pepakin ea uinmaiwen taea ana jawa dateama jiwekunkainxanikiki. 23 Junibu chakabu jatun chakabuwen mawaibu en bechipaiamaki. Jakia shinan betsa wakin jatun chakabu jenetan jiweaibu en kupitiwen jawa dateama jau jiwekubainxanunbun en bechipaimiski. Ea Jehován en jancha chanimawen en mestenwaiin.

24 Jakia tsuada pepai jiwebiakunkainmistun jawen pepa jene keyutan chakabu dasibi inun jawada en bechipaiama en dananmis akubainaibudan, ¿en jatu kupiama jiweyukunkainai dabanen man shinain? Jaskamaki. Jaskai pepa jiwekunkainima en ana shinanma ea ikunwain jenei chintuntan ibubis jawen chakabuwen taea jau mawanun en kupixanaai. 25 Ea en pepa bestiwen en matu mekebia matun shinan chakakin man ea chitemisdan, matu yuinun ninkakanwen. Matun yuikin: ‘Jhován nuku pewakubainamaki’, man ikaii. Jakia man Israelin enabudan, en eamaki, chakabudan. Jakia ea binumakin ea ninkama man chakabuwasibuki. 26 Juni pepatun jawen pepa jenetan chakabukunkainaidan, ibubis jawen shinan chakabuwen taea mawaxanikiki, en kupiadan. 27 Jakia juni chakabun jawen chakabu jenetan ana padanananma inun chanichakama ikunkaini jawen jiwea paxaxanikiki, en kupiamadan. 28 Jamen betsadan, tsuanda jawen chakabu betsa betsapa unantan jenekin shinan betsa watan chanima jiweyuxanikiki, en kupiamadan.

29 En Jhová man Israelin enabun ekidi yuikin: ‘Jhován pepawen nuku mekeismaki’, man ikaya ¿jaskakin en yunutiwen en matu pe jiwemaismamen? ¿Jakia man matumamen, pepa aki man jiweismadan? 30 Man Israelbudan, ¿matu tibi jaska man jiwemiswen taea ean en matu unanti watidumamen? Ea Jhován en jancha chanima en mestenwaiin. Ibubis man ea sinatamabiamis jawen taexun en matu kupiyamaxanun matun chakabu dasibi jawaida jene keyudikanwen, jamen matun jiwea man benuyamaxanunan. 31-32 Ea sinatamakubainkin matun chakabu jaska man akubainai jenetan shinan pepa shinankin yushin pepa bena bikubainkanwen. Tsua man mawayamanun, iwanan, en bechipaiamawen taea Israelin enabuun, kupia yumain ¿jaskai man mawaxanai? Matun chakabu jene keyutan jiwei pedikubainkanwen, en jawen taexun en matu kupiyamaxanunan. Ana chakabuwama jiwei pe bestikubainkanwen, akin ea Jhován en jancha chanima en mestenwaiin”, ikaya en jatu yuixuniki, Israelin enabudan.

Jaska Jhován jatu medabewaxanai Israelin enabu yuiniikiaki, na janchadan

36 16 Ana badi betsatian Jhován ea jancha wakin yuikin:
17 “Israelin enabu jatun mai pakea en medibi jatu inani anu

jiwexun chakabuwakubaini atimapakin ea bechipaimama inibuki. Jaskai jiwekubainkin jatun mai pakea atimapa detsis keska waibun jaskaibu en jatu dananjaidaniki. ¹⁸Januxun jatunabu betsabun jawa jatu wabumabia e iskaun jatun mae anuxun jawenabun jatu detekubainaibu inun, yushibu dami kenwain jaki beamaibuwen taexun ea jatuki sinatakawan ¹⁹ja jiwe chakakubainaibuwen taexun mai pakea betsa betsapa anu nawabu jabun unanbuma anu ean jatu ichakawayukin en jatu sa akin keyuniki, jatun chakabuwen jatu kupikinan. ²⁰Jakia janida nawabun enabu jatu iyukin jatun mae anu jatu bichitan en kena medibi jabukidi yuikin: ‘Nadan, Jehován enabubia jatun mai pakea anua jatu taxnimabidankin nenu jatu iwenibuki’, jatu akubainaibun ²¹jatu achitan iyukin mae betsa anu jatu bichiabun Israelin xenipabun chakabuwen taexun nawabun en kena medibibiaken ea jatu yuanmaibu ninkakin uin en bika tenejaidakubainai.

²²Jaskawen taexun Israelin enabu ea jatu yuixuntanwen: Eska Jehován matu yuikiki, akinan. Israelin enabuun, jaska akin en kushipa en taxnimaxanaidan, matu medabewanun, iwanan, en akamaki. Jakia janida nawabu anu buxun ekidi man jatu chakabu janchamakubainai en kena medibi unankin jau jabundi ea unanxanunbun en axanaii. ²³Jatu anuxun man ea chitekin yuanbiaya ja nawabu bebunxun en kena medibi kushipa en jatu uinmaxanaii. En jatu jaska waxuna ea uin ea besti en Jehová jabun ea unankubainxankanikiki. Ea Jehován en jancha chanima en mestenwaiin. ²⁴Mai pakea betsa betsapa anu nawabu tibi anu matu iyunibu anua matu ana ikin ichawaxun matun mai pakea anu en ana matu chintunmaxanaii, janu man ana jiwei buxanunbunan. ²⁵Unpax kayabi bexnajaidawen matun beya betsa betsapa detsis keska en matu chukaxanaii, man yushibu dami kenwain man atimapamis tibi matu tede akin keyukinan. ²⁶Matu jaska watan juinti anu shinan bena inun en yushin kushipa bena en matuki mistuxanaii, ja matun juinti kushi mishki keska tsekatan juinti nuikipa mistukinan. ²⁷Matu medan en yushin mistuxun en yunuti jancha inun, en nemati jancha inun, en yusinti jancha man jawen jiwekin man ea uinunbun en matu chibanmakubainxanaii. ²⁸Ja mai pakea betsa matun xenipabu en jatu ibuwamani anu ana man jiwekunkainxanaii, man jadi ana jiwea man enabuwen taea eadi en matun mekenika Dios idiakunkainxanaii. ²⁹Jadixun matun beya chakabu betsa betsapa en matu putamaxanaii. Matun xekiwan trigo matu jamen axunkin en ana matu buni yunuama ixanaii. ³⁰Ja dikabi jau yudabu jiwebaunxun matu uinkubainunbun buni paewen man ana dakeyamaxanunbun matun miban ji inun matun bai anu miban tibi bimijaida en matu waxunkubainxanaii. ³¹Jiwechakakin man chakabuwakubaini shinain, ea danain man atimapakubainiwen man ibubis dakekubainxanaii. ³²Israelin enabuun, ea Jehován en jancha

chanima en mestenwain ea ninkakanwen. Na matu eska wakinan, ean en shinanen, en matu akamaki. Jaska man bechipaii keska ibubis man chakabumiswen bika tenei itimaskai dakekubainkanwen, ibubis ma kenmiswen taeadan.

³³Ea Jehován en ana matu yuii ea ninkakanwen. Matun chakabu matu pewakin keyutan matun mae tibi di iki chakabuni ana pewatan ja mae anu man jiwekubainxanunbun en matu yunuxanaii. ³⁴Mai pakea janu matun ibubu jiwepaunibu anu badi ichapa tsua janu jiweabumabiaken ja janu jiweabuma anuxun man ana bai bena wakubainxanaii. Tsuabuda janu kapukekin man ja mae uduai matu uinxankanikiki. ³⁵Jabu yuinamekin matukidi yuikin: ‘Na maidan, badi ichapa janu tsua jiweabuma ibiani ikis dasibi jawenduajaidaki, Edén anu Diosun bai jawendua wani keskadan. Jatun mae tibi bedankin chakabuwakin keyutan jenebainibu ikis ana pewatan mishki kenebaunkin keyutan janu ma jiwekanikiki’, akin matu yuixankanikiki. ³⁶Januxun ja nawabu matu dapi jiweabun ea unanxankanikiki. Ja mae bedankin chakabuwanibu en ana matu bena wamai inun matun yunu bai betsekin chakabuwanibu en ana matu banamai kai jaska bebunkidi en chanini en Jehován en ma matu amai jabun uinkin unanxankanikiki.

³⁷Ea Jehován en jatukidi yuiaidan, Israelin enabun jabun ea yukai binumakin en jatu pejaida waxunxanaii. Jabudan, chaxuwan xukua pamis keska wakin yuda ichapa en jatu pawakubainxanaii. ³⁸Janu besiaibutian ea kenwankin jatun chaxuwan xeni ea kuaxunun ika jatun chaxuwan bekin Jerusalén anu ichawakin mata wamisbu keskai mae tibi bedanbianibu anu ana yuda ichapa ichaxankanikiki. Jaskaibun ea en Jehová kushipa jiwea ea unanti wakin shinankubainxankanikiki”, akin Jehován ea yuia en jatu yuixuniki.
